

Noticia
Transparente
di Gobierno

ISLA ONLINE

Diahuebs 8 Februari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



PROME MINISTER

Evelyn Wever-Croes

PROCESONAN ANDANDO PA PRIVATISA RIOOL WATER ZUIVERINGS INSTALLATIE (RWZI)



Diaranson Parlamento a aproba Presupuesto 2024 di Dienst Openbare Werken (DOW). Prome Minister Evelyn Wever-Croes durante e reunion publico a duna informacionnan y a contesta hopi pregunta riba e topiconan principalmente di careteranan y Riool Water Zuiverings Installatie (RWZI) na e planta na Bubali. E intencion ta pa privatiza RWZI y e trabounan pa esaki ta andando.

Prome Minister a informa cu Parlamento pronto lo trata e ley pa privatiza RWZI pa pon'e den man di un compania estatal cu ta bay resorta bou di Utilities Aruba NV cu tin e fondonan y lo inverti y soluciona e problemanan di RWZI structuralmente. Mientrastanto Gobierno lo sigui mantene RWZI pa e causa menos molester posibel. ■■■

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

Tur dialuna y diahuebs | 10:00 am

Prome Minister Evelyn Wever-Croes: Presupuesto 2024 di Dow a wordo aproba

TIN 10.4 MIYON FLORIN PA DRECHA CARETERA DEN 2024



Diaranson mainta, Prome Minister Evelyn Wever-Croes tabata den Parlamento pa trata e Presupuesto 2024 di Dienst Openbare Werken (DOW). Manera conoci, DOW ta un compania estatal cu su mesun presupuesto, cu tin e vision pa sigui traha na mehora e servicio na comunidad, na percura pa e mantencion di obranan publico ta "up to date", percura cu e trabounan ta wordo monitoria y pa no warda te ora cu bin keho di ciudadanonan pa haci e trabou. Tambe, internamente DOW ta trahando pa finalisa e re-organisacion, y e digitalisacion di e departamento. Prome Minister a indica cu tin 10.4 miyon florin pa drecha caretera den 2024.

Un tema cu a haya hopi atencion den e presupuesto ta e tema di careteranan cu ta den hopi mal estado. Prome Minister a splica cu durante pandemia, Gobierno mester a haci uzo di

e placa cu tabata destina pa asfalt pa sobrevivi, y awor ta purbando di gara forsa bek. E aña aki, Gobierno a logra un suma di 10 miyon florin pa mehora e careteranan, cu ta un suma grandi pero no suficiente pa tur e trabounan cu mester wordo haci. Mirando e magnitud di trabou, Gobierno a traha un masterplan, con den 17 aña, tur e careteranan mester wordo drecha. Esaki ta encera trabounan hopi grandi y Aruba no tin e capacidad pa haci tur e trabou aki den poco tempo. Gobierno ta den e fase pa busca financiamento pa e masterplan aki pa despues por anuncia ki aña ta turno pa cua caretera.

"Na fin di dia, importante ta pa DOW mantene e obranan di Gobierno y duna servicio na comunidad. Mi ta gradici Parlamento pa nan sosten pa cu aprobacion di Presupuesto 2024 di DOW", Prome Minister a expresa. ■■■

Prome Minister Evelyn Wever-Croes:

BAN TUR HUNTO TA DOÑONAN DI MASCOTA MAS RESPONSABEL

E luna aki nos kier sigui conscientisa nos comunidad tocante e problematica di cacho na Aruba. Un problema cu ta causa molester keto bay cerca hende practicando deporte, cu hasta ta cana cu un palo den man (pa si en caso nan mester defende nan mes ora un cacho ataca nan). Ciclistanan por accidenta mas lihe ora cacho ta persigui nan.

Minister Ursell Arends a nombra luna di januari como luna di microchip mascota. Microchip mascota ta un punto di salida hopi importante pa muestra cu bo ta un doño di mascota responsabel. P'esey nos ta urgi tur hende pa chip nan mascota. Importante ta pa nos realisa e responsabilidadnan ora di dicidi di tuma un mascota y tur locual ta rekeri pa nos por cuida bon pa nan.

Na Merca, luna di februari ta luna di conscientisa comunidad tocante sterilisacion y castracion di mascota. E no ta solamente un bon manera pa yuda cu control di e poblacion, e tin tambe hopi beneficio pa e salud di mascota mara na e operacion aki.

Prome Minister Evelyn Wever-Croes a duna di conoce cu na 2019 Ministerio di Asuntonan General a institui un comision di accion pa logra e metanan di e plan nacional pa atende cu e problematica di cacho na Aruba. Asina a bin ta logra varios cambio necesario, manera e Centro di Control di Cacho (CCC) cu tawata e prome logro y a elimina e imagen di "killcage" cu tawatin pa hopi aña. A introduci un Unidad di Control di Cacho (DCU), y a manda pidi pa revision di e leyman vigente pa cu puntonan cu ta importante pa nos tin den nos ley, entre otro registracion pa controla e rasamento di cacho, registro obligatorio di tur cacho a traves di microchip, y mas punto cu mester un base legal mas fuerte. Tambe Gobierno di Aruba tur aña a lansa un concurso di pintamento pa conscientisa nos muchanan di chikito caba tocante Aruba su Ley di Cacho.

Na 2021, Prome Minister a traspasa e plan nacional pa su colega Minister Arends por sigui ehecuta esaki den su ministerio di naturalesa y a sigui logra pasonan crucial.

Un di nan sumamente importante, tawata pone medionan disponibel pa laga diseña un database pa registro di mascota, cumpra microchip pa ofrece na comunidad pa por registra nan cacho den e database, cumpra mas material pa e CCC y tambe pa e DCU (cu desde medio aña 2022 no ta activo mas) y tambe pa organisa campañanan di conscientisacion.



Tambe a logra cu e proyecto di Animal Control Department a wordo aproba como inversion pa e aña 2023 di cual construccion lo cuminsa e aña aki. Y finalmente e material di educacion cu ta den fase final pa por wordo presenta na tur scol preparatorio y scol basico pa nan uza esaki entrante e aña escolar nobo. Cuerpo policial tambe a haya curso pa por a inicia cu campaña di conscientisacion y accion pa doñonan mantene nan cachonan den cura.

"Ainda tin hopi mas cu Gobierno di Aruba ta desea di logra riba e tereno aki.

Pero Gobierno su so no por soluciona e problema aki. Ta hunto nos mester haci'e. Y e ta cuminsa cu nos cada un cu tin un mascota purba ta un doño di mascota mas responsabel", Prome Minister a expresa.



Minister Maduro di Finansa ta informa:

CONSEHO DI MINISTER A HAYA PRESENTACION DI CITI BANK PA HAYA UN BISTA DI E MERCADO INTERNACIONAL DI CAPITAL

Aruba ta prepara pa por bay bek e mercado internacional di capital y pa e motibo aki Minister Maduro di Finansa ta reuni desde aña pasa cu diferente banco.

Algun siman pasa riba peticion di Minister di Finansa, Consejo di Minister a haya un presentacion di ehecutivonan di Citi Bank riba e posibilidadnan pa Aruba riba e mercado internacional di capital.

Ya pa varios decada caba Gobierno ta cubri e necesidad financiero di Aruba riba e mercado internacional di capital. Durante di e pandemia esaki no por tabata posibel, ya cu Aruba su economia y finansa a keda grandemente afecta y cune Aruba a perde e credibilidad financiero cu ta necesario pa haya e confiansa di inversionistanan riba e mercado di capital. Awo cu nos ta cuater aña despues, Aruba a conoce un recuperacion economico y financiero grandi cu ta brinda oportunidad pa por bolbe bay ta activo bek riba e mercado internacional di capital.

Den preparacion pa subi e mercado internacional, Minister Maduro a pidi Citi Bank pa brinda Consejo di Minister un presentacion pa asina tur Minister por ta na altura di e posibilidadnan cu tin pa Aruba por haya refinancia su debenan cu ta madura den aña 2024. Citi Bank lo bay asisti Gobierno den e preparacion necesario, specialmente pa locual ta trata e evaluacionnan di e companianan di rating cu ta evalua Aruba su credibilidad financiero.

Minister Maduro ta gradici Citi Bank pa e presentacion y asistencia cu nan ta brinda na Consejo di Minister y na Aruba. Mester menciona cu den team di Citi Bank tin un profesional Arubiano sr. Dustin Ling y esaki sigur a haci e presentacion un tiki mas special, pa cual e mandatario ta gradici Citi Bank tambe pa e confiansa aki den un Arubiano. ■■■





A TRATA E AVANCENAN DI RENOBACION DI E ATLETIEKBAAN NA COMPLEHO DEPORTIVO GUILLERMO PROSPERO TRINIDAD NA DAKOTA CU ARUBAANSE ATLETIEK BOND



Durante siman, Minister di Deporte Endy Croes hunto cu Ministerio di Deporte a reuni cu Sr. Rammy Ramada y e miembronan di directiva Arubaanse Atletiek Bond Sra. Susan Werleman y Sra. Anecy Toussaint. Durante e reunion, a trata e avancen di e atletiekbaan di e proyecto di renobacion di Compleho Deportivo Guillermo Prospero Trinidad na Dakota. Den luna di maart e atletiekbaan lo yega Aruba y pronto lo instala esaki. Tambe, Arubaanse Atletiek Bond a duna di conoce cu nan “timing system” ta bieu y no ta den bon condicion. Ta consehabel pa inverti den un “timing system” nobo.

Pa cu esaki mester sa cua sistema e ta, paso unabes cu lanta e atletiekbaan bieu mester core e tubonan di coriente prome cu instala e nobo. Den e caso aki Sr. Ramada su compania Patrishi

Sports tin e experiencia, experticio y ekipo pa realisa e trabou aki. Sr. Ramada a duna un presentacion di un sistema cu e por facilita Arubaanse Atletiek Bond bou di cierto condicionnan. E presentacion a cay den bon tera y e representantenan a haci varios pregunta. Awo Atletiek Bond tin cu bay den nan seno pa mira y analisa e otro opcionnan. A palabara cu den e luna aki lo tuma un decision.

Minister Endy Croes a agrega cu Ministerio di Deporte lo financia e sistema moderno cu tin mester pa complementa e proyecto di e “track and field”. Pa finalisa, Minister Endy Croes a indica cu e tabata un bon reunion y ta keda en espera di e conseho y escogencia final di Arubaanse Atletiek Bond.



Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD